

【學騎車仔】鄒瑞梅原作

在佢讀小學一年生個時節，阿爸輒常用自行車載佢去學校讀書。上崎個時節，阿爸大粒汗細粒汗踏到散氣毋上；下崎個時節，就溜一路下。路個兩片種等歸排個竹仔，還有一頭黃梔仔花¹，風吹啊過來，黃梔仔花個清香，佢到今共樣還記到清清楚楚。

佢盡好坐在後座仔，聽阿爸話天說地，阿爸不時教佢做人個道理，佢講：「大人毋講古，細人仔毋知寶。」兩子爺一路唱歌唸曲，山歌溜天，還有三字經摺弟子規也係佢坐在貨載仔頂學會個。

到佢讀三年生個時節，想愛騎自行車，就拜託阿爸教佢騎。阿爸摺自行車牽到大禾埕，過擎一枝擔竿縳在後架仔，佢講怎樣車仔橫下來個時節，佢就毋會分車仔砣著。阿爸捍等後架仔分佢坐好勢，過教佢兩隻腳踏在腳踏仔頂，大力牯一踏，車仔就行咗。佢個心肝就像「十五個吊桶打水——七上八落」當緊張呢！阿爸在邊脣同佢做膽，佢講：「『知得該孔竅，打得該鬼噉。』較細義兜仔，毋使驚，阿爸在後背同你掌等。」

¹ 黃梔仔花：音 vong^ˇ gi^ˊ e^ˋ fa^ˊ；黃梔子花。花名。茜草科，黃梔子屬。常綠灌木或小喬木，高約三公尺，花瓣六枚，氣味幽香，初開時為白色，花謝時漸轉為乳黃色。

佢當煞猛練習，全無歇睏，大禾埕緊來緊鬧熱，阿哥、阿姊、老弟、老妹還有隔壁個阿明、阿秀通棚走過來同佢加油，連阿明畜個狗仔也跔在吾車仔後背換來換去。恁多人在該看佢騎車仔，做毋得漏氣哦！係跌倒就盡無面子，阿明定著會去學校做報馬仔講分同學笑話佢。

為著無愛分阿明摺同學笑，佢盡拚勢練習。哈哈哈哈哈，無一點鐘久佢就曉騎哩。阿爸同佢講：「還慶哦！毋聲就毋聲，一聲就打爛盞。」阿爸個話正講出嘴，手一放，車仔就橫下來咗，正經還見笑哦！賺痛個，吾手巴掌、腳膝頭都鑊溜皮咗，還痛哦！痛到佢目汁濫汨。

大家都無笑佢，還走兼來關心佢有仰般無？阿明問佢還愛練無？加講個，「趕燒趕熱」哪有毋練個道理？阿爸看佢有增志，過一擺捍等後架仔，分佢騎上自行車，佢盡力牯踏，練到汗流脈落，這擺正經曉騎哩！佢歡喜廩天²，大大聲同阿爸講，等佢大咗，一定愛用這臺腳踏車載阿爸滿哪去寮！遠遠，看著阿爸同大家企在禾埕脣，笑到嘴弛弛仔。

² 歡喜廩天：音 fon^ˊ hi^ˋ lag^ˋ tien^ˊ；欣喜異常。